

इवनिंग डोगरी न्यूज़ बुलेटिन

समे 18:15 Hrs

<><><><><><>

Headlines

- गृहमंत्री अमित शाह होरें जम्मू-कश्मीर च विकास परियोजनाएं दी समीक्षा कीती ते आखेया जे निवेश-उद्योग- खेड्डें ते ढांचागत विकास गी बढ़ावा देना उंदी प्राथमिकता ऐ।
- मुखमंत्री उमर अब्दुल्ला होरें आखेया ऐ जे फिलहाल कोई नमी प्रशासनिक इकाईयां नई कायम कीतियां जा'रदियां ते उंदी सरकार मजूदा इकाईयें गी तगड़ा बनाने बक्खी चेचा ध्यान देया करदी ऐ।
- सरकारै विधानसभा च आखेया ऐ जे जिमीं दे इस्तेमाल सरबन्धी नियमें च छूट देने दी फिलहाल कोई योजना नई ऐ।
- जम्मू-कश्मीर दे बशेष दर्ज गी लेइयै विधानसभा च नैशनल कांफ्रेंस ते बी.जे.पी. बश्कार त्रिक्खी बैहस-विपक्ष दे नेता सुनिल शर्मा होरें आखेया जे भारत दे संविधान च ऐसा कोई शब्द नई ऐ।
- ते सेना अध्यक्ष जनरल उपेन्द्र द्विवेदी होरें पुंछ दा दौरा लाइयै फौजी अधिकारियें ते साबका फौजियें कन्नै गल्लबात कीती।

<><><><><><>

HM Devp. Meeting

केन्द्री गृहमंत्री अमित शाह होरें जम्मू-कश्मीर च विकास परियोजनाएं च हासल प्रगति दा जायजा लैने लेई इक उच्ची सतह दी बैठक दी प्रधानता कीती- जिस दरान प्रदेश च महत्वपूर्ण ढांचागत कम्में ते केन्द्र सरकार आसेया चलाई जा'रदी परियोजनाएं दी अमलावरी बक्खी चेचा गौर कीता गया। गृहमंत्री होरें परियोजनाएं स्हाबै अमल-आवरी दा जायजा लैता ते विकास प्रोजैक्टें गी बेल्ले सिर सबूरा करने दे निर्देश जारी कीते। उ'नें आखेया जे रास-पूंजी- उद्योग- खेड्डें ते ढांचागत विकास दे खेतरें च पिच्छले इक दहाके दरान होए दे विकास गी होर तेज करना ते जम्मू-कश्मीर गी मता विकसित बनाना- उंदी सरकार दी प्राथमिकता ऐ।

लैफ्टिनेंट गवर्नर मनोज सिन्हा- मुख्खमंत्री उमर अब्दुल्ला- केन्द्री गृह सचिव गोविंद मोहन- मुख्ख सचिव अटल डुल्लु ते जम्मू-कश्मीर पुलसा दे डरैक्टर जनरल नलिन प्रभात हुंदे सनें होरनें बी केइये वरिष्ठ अधिकारिये इस बैठका च हिस्सा लैता। मगरा गृहमंत्री शाह होर रायपुर- छत्तीसगढ़ लेई खाना होई गे।

<><><><><><>

CM- Adm Units

मुख्खमंत्री उमर अब्दुल्ला होरे आखेया ऐ जे नमीं प्रशासनिक इकाईयां कायम करने दी उंदी सरकार दी फिलहाल कोई योजना नैई ऐ ते उंदी प्राथमिकता पैहले खडेर गेदे युनिते गी खरी चाल्ली चालू बनाना ऐ। मुख्खमंत्री होरे एह गल्ल खानयार दे विधायक सलमान अली सागर ते केई होरनें सदस्ये आसेया सोआले दे समे दरान पुच्छे गेदे पूरक -प्रश्ने दा परता दिंदे होई आक्खी। एह विधायक ईदगाह ते श्रीनगर नार्थ आली तैहसीले हेठ पौने आले किश इलाके गी तकसीम करिये इक नमीं तैहसील बनाने दी मंग कराखे हे। सदन गी इस बारे जानकारी दिंदे होई मुख्खमंत्री होरे आखेया जे उंदी सरकार- जम्मू-कश्मीर च पैहले शा कायम कीती गेदी प्रशासनिक इकाईये गी पूरी चाल्ली चालू बनाने बक्खी चेचा ध्यान देआ करदी ऐ। उनें आखेया.....

<><><><><><>

Rana Land Use (Byte)

सरकारे अज्ज एह साफ कीता ऐ जे राजस्व विभाग च ऐसा कोई बी प्रस्ताऽ जेर-ए-गौर नैई ऐ- जेहदे तैहत जिमीं दे इस्तेमाल सरबन्धी नियमे च कोई छूट दिती जा। विधानसभा च अज्ज सुरजीत सिंह सलाथिया हुंदे आसेया पुच्छे गेदे इक सोआले दे परते च मंत्री होरे एह गल्ल आक्खी। मंत्री होर मुख्खमंत्री उमर अब्दुल्ला हुंदी थाहरे पर परता देया करदे हे। उनें आखेया जे जिमीं दे इस्तेमाल सरबन्धी नियमे च छूट देने दी फिलहाल सरकार दी कोई मंशा नैई ऐ। उनें आखेया.....

<><><><><><>

MP Budget Awareness

केन्द्री बजट सरबन्धी जागरुकता अभियान दे इक हिस्से दे तौर पर सांसद जुगल किशोर हो'रें अज्ज उधमपुर दा दौरा लाया। इस बरे दे केन्द्रीय बजट गी विकसित भारत दी बुनियाद दस्सदे होई सांसद हो'रें गलाया जे एहदे च आम लोकें दियें बुनियादी जरूरतें गी पूरा करदे होई भारत गी इक विकसित राष्ट्र बनाने पर ध्यान केन्द्रित कीता गया ऐ। उ'नें आखेया जे खजाना मंत्री निर्मला सीतारमण हुंदे आसेया पेश कीता गेदा एह बजट- भारत गी आत्मनिर्भर बनाने दी मंशा गी दर्शादा ऐ। केन्द्र सरकार नै इस गल्लै गी यकीनी बनाने लेई सब्भनें खेतरे पर एहदे च खास ध्यान दिता गया- तां जे आम लोकें गी फायदा होई सकै। इस मौके पर बोलदे होई सांसद जुगल किशोर हो'रें गलाया.....

<><><><><><>

ODOP –Fest

जम्मू-कश्मीर च बपार-कारोबार गी बढ़ावा देने सरबन्धी संगठन JKTPD औंदी 10 फरवरी गी जम्मू दे कन्वेंशन सेंटर च “इक जिला- इक उत्पाद” ते जिले गी निर्यात दा इक गढ़ बनाने सरबन्धी पैहलकदमियें दे इक हिस्से दे तौरा पर इक जिला-इक उत्पाद -Fest Buyer Seller Meet दा आयोजन करोग। इस उत्सव दा मकसद जम्मू-कश्मीर दे बक्ख-बक्ख जिलें दे खास उत्पादें गी उजागर करना ऐ ते इनें'गी राष्ट्रीय ते वैश्विक बजारें कन्ने जोड़ियें मजबूत सरबन्ध कायम करना ऐ। इस कार्यक्रम च मुख्य भरै थमां 25 शा मते खरीददारें कन्ने सामान बेचने ते खरीदने आली बैठकां लाइयां जागन- जेहदे कन्ने मकामी उत्पादकें- कारीगरें ते उद्यमियें गी इंदे कन्ने जुड़ने लेई इक सिद्धा मंच उपलब्ध होग।

<><><><><><>

NC -BJP Duel

अज्ज विधानसभा च जम्मू-कश्मीर दे बशेष दर्जे गी लेइयें सत्ताधारी नैशनल कांफ्रेंस ते विपक्ष भारतीय जनता पार्टी बश्कार बहस-बाजी होई। एह बहस उस्सलै शुरु होई जिसलै नैशनल कांफ्रेंस दे विधायक जाविद बेग होर जम्मू-कश्मीर दे बशेष दर्जे बारे बड़े जोश कन्ने गल्ल करा'रदे हे।

एहदे पर बरोध जाहिर करदे होई विपक्ष दे नेता सुनील शर्मा होरें गलाया जे बशेष दर्जा ज्नेही कोई चीज नई ऐ।
उंदे इस ब्यान पर एन.सी. दे विधायकें दफा 370 दे समर्थन च नारे लाने शुरु करी दिते। बी.जे.पी दे विधायकें
बी नारेबाजी शुरु करी दिती- जेहदे करी किश मिन्टें तगर हंगामा जारी रेहा ते गतिरोध आली स्थिति बनी गई।

<><><><><><>

MLAs Public Issues

जम्मू-कश्मीर च इस्सलै जारी बजट इजलास दौरान अज्ज कैई विधायकें अपने-अपने हलकें च लोकें गी पेश
आवा'रदी दिक्कते-परेशानियें गी सदन च उजागर कीता ते सरकार गी फौरन सुधारात्मक कारवाई करने दी अपील
कीती। गुरेज दे विधायक नाज़िर अहमद खान होरें सदन गी जानकारी दिती जे उंदे हल्के च कोई पटवारी
उपलब्ध नई ऐ- जेहदे करी लोकें गी बड़ी मती मुश्कलें दा सामना करना पवा'रदा ऐ। श्री माता वैष्णो देवी हलके
थमां विधायक बलदेव राज शर्मा होरें बी खच्चर ते घोड़े आलें दे कन्नो-कन्नी पिटूआलें आस्तै इक व्यापक
पुनर्वास पैकेज दी मंग कीती। इस्सै चाली बीरवाह दे विधायक डाक्टर शफी अहमद वानी ते करनाह दे विधायक
जावेद मिरचल होरें बी अपने-अपने हलके कन्नै जुड़े दे मुद्दें पुट्टें।

<><><><><><>

Army Chief -Poonch

सेना प्रमुख जनरल उपेन्द्र द्विवेदी होरें अज्ज पुंछ दा दौरा लाया ते सेना द अधिकारियें ते साबका फौजियें
कन्नै मलाटी कीती- जिंदे Ordinary कैप्टन परवेज अहमद हुंदा परोआर बी शामिल ऐ। उ'नें आतंक-रोधी ग्रीड ते
कारवाइयें सरबन्धी तयारियें दी समीक्षा करदे होई सतर्कता बरतने ते लोकें पर केन्द्रित रौंह गी अपनाने पर जोर
पाया। सेना दे कमांडर हो'रें जनरल द्विवेदी होरें गी सुरक्षा हालात बारे जानकारी दिती ते जोआनें दे पेशेवराना
रवैये दी सराहना कीती। अपने दौरें दौरान सेना प्रमुख हो'रें फिल्ड कमांडरें-साबका फौजियें ते मकामी पुलिस
अधिकारियें कन्नै गल्लबात कीती ते सुरक्षाबलें ते सिविल अधिकारियें बश्कार तालमेल दी जरूरतें पर जोर पाया।
उ'नें इलाके च सुरक्षा हालात दा जायजा लैने लेई नियंत्रण रेखा आले इलाकें पर डोआरी बी भारी। तौंआई People
Forum Poonch दे प्रधान Adv. संजय रैणा होरें सेना प्रमुख हुंदे दौरें बारे बोलदे होई गलाया.....

<><><><><><>

मौसम विभाग नै जम्मू-कश्मीर च अगले किश दिनें धोड़ी मौसम आमतौर पर खुशक रौहने दी पेशगोई कीती ऐ पर उच्चियें धारें पर मौसम च किश बदलाव होई सकदा ऐ। आकाशवाणी संवाददाता नै मौसम विभाग दे हवालै नै जानकारी दिती ऐ जे अज्जै थवा मौसम आमतौर पर साफ रौहने दी मेद ऐ। 7 ते 8 फरवरी गी मौसम आमतौरा पर खुशक रौहने दी मेद दस्सी गेई ऐ पर 9 ते 10 फरवरी गी किश उच्चियें थाहरें पर हलकी बर्फबारी ते बरखा होई सकदी ऐ। 11 ते 12 फरवरी थमां मौसम फही आमतौर पर खुशक गै रौहग। मौसम बारे होर मती जानकारी दिन्दे होई मैहकमे दे निदेशक मुखतार अहमद होरें आक्खेआ.....

<><><><><><>